

山漁人精華錄訓纂

冊三



漁洋山人自撰年譜卷上

小門生東吳惠棟定字註補

同學諸子參

山人名士禎姓王氏字子真一字貽上號阮亭青州諸人自註即今諸城

始祖諱貴遷濟南新城著籍焉稱瑯琊公

公居諸城古瑯琊地也當元末白一作花馬軍亂公徂擊之殺一賊

度不能抗乃避居新城之曹邨為某大姓傭作一日大風晦冥有

一女子從空而墮良久既霽公於塵壘中得之云即諸城縣初氏

女也晨起取火不覺至此時公方鰥居女子年十八九主人以為

天作之合遂令諧伉儷焉三世至潁川公而讀書仕宦四世至太

僕公始大其門二百年來科甲蟬連不絕皆初夫人所出也初夫人事

載見瑯琊公之裔孫立峯先生大槐記及伍袁萃林居漫錄謝在杭五雜俎諸書嘉興賀燦然駁之以為語怪非也

二世祖諱伍有善行稱善人公

瑯琊公五子善人最少性醇謹事父母諸兄皆得其歡心尤好施予歲時勤力治家人產計口給食餘悉以賑鄉里貧乏者門前植槐一株枝葉扶疎時作糜哺餓者于其下諸餓者以次受糜紡其笠于槐纍纍如也鄉人呼之曰王菩薩而稱其家曰大槐王氏善人既多隱德嘗夢神人以冠簪笏囊分布槐枝之上顧曰以報汝識者以是卜其後之必大也

三世祖諱麟明經官潁川王府教授稱潁川公

潁川爲善人次子生而警穎彊記于書無所不覩受詩于畢文義

理十四補博士弟子員每試輒冠其羣數困棘闈隨例應里選官

永平郡司訓勸學興行爲多士式久之遷諭鹿邑廣勵功令如校永時士風丕變最後遷教授潁川王府既至疾作浹歲而卒志傳稱公內廉行修人倫醇備事大父瑯琊公至孝遇諸兄弟門以內蒸蒸如也蓋自公以毛詩起家接武列卿御史尙書郎祕苑方岳

郡邑長吏皆名臣。膺仕布列中外人皆謂善人之食報于茲乃驗矣。

高祖諱重光明嘉靖辛丑進士歷官貴州按察使參議歿於王事贈太僕寺少卿諭葬祭稱忠勤公。

公字廷宣嘉靖丁酉舉於鄉辛丑成進士授工部主事理徐州洪潁川公卒哀毀如禮服闋除戶部權稅九江廉弊竇除豪猾省乾沒及期歲省國漕數百石當事以其能晉秩僉事守雲中強直奉法軍民賴之尋晉參議守上谷條上谷機宜十二事悉中窾要以忤當事意調貴陽時赤水黑白羿蠻叛川貴戒嚴丁巳肅皇新三殿求大木取辦貴竹諸彝爲梗公至以便宜往撫平之彝人感其德爭以所知異木走報公公采入其阻衝風瘴癘勤事以死事聞特加恩卹賜祭葬壬戌秋三殿告成以公前績詔贈太僕寺少卿公性孝友爲潁川公次子方齷而母沈安人亡三事繼母常岳盧

如所生兩弟早夭撫其遺孤不殊己子居鄉恂恂退讓君子也敷
歷中外遇事慷慨不避艱險及卒無一語及家事世廟諭祭文有
忠勤報國之褒故稱忠勤公焉

曾祖諱之垣嘉靖壬戌進士歷官戶部左侍郎贈本部尙書自潁川
已下以太師公象乾貴俱贈少師兼太子太師兵部尙書

公字爾式里人稱見峯先生太僕公次子少能文章未冠補邑諸
生戊午舉鄉試壬戌成進士授荊州府推官多所平反隆慶丁卯
徵入爲刑科給事中尋擢禮科右兵科左持節使鄭還遷禮科都
給事中以言事激切忤旨奪俸請急歸省明年起刑科擢太僕寺
少卿三月改鴻臚寺卿甲戌擢大理寺少卿踰年擢順天府尹旋
以都察院右副都御史巡撫湖廣三載詔錫贈封如例庚辰內遷
戶部右侍郎奉命攝理京營戎政明年轉左侍郎總督倉場疏乞
歸省歸二十年而卒訃聞詔賜祭葬贈戶部尙書公少績學攻苦

茹澹窮日夜不輟及貴猶然子孫遵用其教皆以節儉世其家生平行事詳公所載歷仕錄

祖諱象晉萬曆甲辰進士歷官浙江右布政使贈刑部尚書

公字子進別字康宇司徒公季子也中萬曆甲午舉人甲辰進士授中書舍人癸丑考選同鄉諸公皆欲以臺省處之適太師公方以薊遼總督召爲本兵而故事父兄官內閣及六卿者子弟無得居言路其見居職者例改翰林官故太師欲暫歸爲公地卽來而翰林可得也公力爭不可以私恩宿君命遂平調禮部儀制司主事甲辰移疾里居久之中忌者以京察調外補江西按察司知事未赴遷行人司左司副又遷禮部精膳司員外郎未幾丁內艱服闋補儀制司員外郎扈惠王之國荊州戊辰春報命陞按察司副使備兵淮揚下車摘伏如神十城憚其風采甲戌陞河南按察使經年所部讞決稱平乙亥遷浙江右布政使公爲人寬厚及見義

勇決不擇利害爲趨避赴人之難如不及然終不爲匡異激切之行年七十致仕生平喜澹泊室無媵侍盛夏整衣冠危坐讀書不輟常舉唐柳玘言誠子孫無矜門第務力學爲善故其家代有名
人由家法之善有以維持之也

父諱與敕

大清順治元年拔貢累封國子監祭酒贈刑部尙書

公四子伯士祿順治壬辰舉禮部乙未進士官吏部考功員外郎仲士禧廩貢監生叔士祐康熙庚戌進士未仕卒山人其季也

方伯公有四子其季爲匡廬公公字欽文性孝謹尤警慧自毀齒就傅所授經書一過輒曉大義數困場屋
世祖皇帝定鼎詔

郡邑選真才充貢太學有司以公名應
詔公以方伯公年老

廷對後不謁選人徑歸謂所親曰吾得以壯年侍老親側躬幫膺洗滌之事遠希萬石家風顧有所未足乎就子舍日夕視寢膳問安否爲憂愉每歲時率子婦奉觴上壽一門五世羅拜庭下方伯

公顧之喜則好爲子姓陳述先世隱德遺事覩縷忘倦公退而申
繹其說環長幼拱聽方伯公卒哀慕如孺子每歲時伏臘家祭上
冢必愴慕盡哀又繪方伯公生平出處事蹟爲圖二十四以示後
人蓋其天性愛慕如此少工駢麗之文晚年猶間爲之中歲好爲
詩輒棄去曰吾偶寫懷抱如絃之有音弦停音寂矣乃欲索之於
無有耶每春秋佳日輒置酒邀邑耆舊促席道舊故爲樂又嘗與
諸兄弟讌集道祖宗勤儉遺事如方伯公當日及公之歿也羣從
兄弟行哭失聲巷春皆罷是可以知公之德矣

故明崇禎七年甲戌閏八月二十八日亥時山人生布政贈尙書公
官河南按察使尙書公及孫夫人隨侍山人生於官舍故小字豫孫
山人爲方伯公十一孫時六兄西樵年九歲七兄禮吉年八歲十
兄東亭年三歲〔池北偶談云〕子生甲戌以辛卯中鄉試乙未中

會試與侯官曹能始

學

相去一甲子無不符合

崇禎八年乙亥二歲隨任之杭州

〔案〕〔考功年譜〕是歲方伯公遷浙江右布政使

崇禎九年丙子三歲

崇禎十年丁丑四歲

崇禎十一年戊寅五歲

是冬左使姚永濟入覲方伯公攝其事姚至京以征解不及額下獄方伯公聞之敕守藏吏籍所貯悉輸之吏辭以考成不便公曰若所言吾豈不知顧姚事急吾視事日淺卽不及降秩耳姚禍且不測與人同寮瀕危而坐視吾弗忍也于是擇吏趨解至部驗牒

課如額姚遂得釋

〔案〕考功年譜方伯公于崇禎十年致政歸此當是九年事

崇禎十二年己卯六歲

崇禎十三年庚辰七歲始入小學

〔池北偶談云〕予六七歲始入鄉塾受詩誦至燕燕綠衣等篇便

覺棖觸欲涕亦不自知其所以然稍長遂頗悟興觀羣怨之旨
崇禎十四年辛巳八歲

山人幼有聖童之目肄業之暇卽私取文選唐詩洛誦之久之學
爲五七字韻語時西樵爲諸生嗜爲詩見山人詩甚喜取劉頃陽
一相所編唐詩宿中王孟常建王昌齡劉脊虛韋應物柳宗元數家
詩使手抄之〔盛侍御珍示曰〕先生八歲能詩西樵吏部授以王
裴詩法後三十年書考功年譜後云文章經術兄道兼師蓋實錄
也 是年西樵補諸生

崇禎十五年壬午九歲冬十二月 大清兵至濟南新城陷
是年禮吉補諸生

崇禎十六年癸未十歲避兵長白山之魯泉

〔考功年譜云〕依外家鄒平孫氏〔長白山錄云〕魯泉在望湖頂

下林壑清美泉水尤甘

崇禎十七年甲申十一歲卽 世祖皇帝順治元年時流賊陷京

師 王師入關定鼎 國號大清改元

時方伯公以遺老居田間自號明農隱士闔門謝客親教諸孫頗

及聲律之學嘗邀從弟洞庭象飲洞庭工草聖有張顛之風酒闌

諸孫競進乞書方伯公把酒命對句曰醉愛羲之蹟山人在傍應

聲曰狂吟白也詩二公皆大喜賞以名人書畫謂匡廬公曰此子

必蚤成

順治二年乙酉十二歲

〔倚聲集〕〔山人嘗云〕僕十二歲時題明湖詩有句云楊柳臨湖

水到門全作都不省記〔漁洋文略云〕予髫時私爲清明憎蚊二

賦傅公彤臣見之激賞有過情之譽 是歲西樵與諸名士爲曉

社

順治三年丙戌十三歲高苑賊謝遷寇新城陷之避兵長白

避地鄒平依張氏時遷聚衆千人連破新城長山諸縣入淄川據
之僭偽號置官屬未幾敗

順治四年丁亥十四歲自長白歸里

是歲西樵食餼于庠

順治五年戊子十五歲夏出應童子試被落

山人自八歲吟詩至是有詩一卷曰落箋堂初藁西樵序而刻之
〔案〕〔倚聲集〕山人髫時嘗作落葉詩數篇大爲先輩所賞有句
云已共寒江潮上下況逢新燕影參差又云年年搖落吳江思忍
向煙波問板橋又有錦秋湖二絕句詠狄仁傑詩一首載見續集
中

秋伯兄舉鄉試

〔考功年譜云〕君兩應省試以文章見斥更降志揣摩以就程式

秋舉于鄉受知給事桐城姚公龍懷文然樞部邢臺李公非熊仲熊齊

東令曲周李公方曼

倩

〔池北偶談曰〕姚公闈中得西樵卷異之

曰他日必爲風雅名家

順治六年己丑十六歲布政公課諸孫嚴山人與諸兄讀書家塾

山人兄弟每自家塾歸孫夫人從牕聞履聲輒呼而問之兒輩今日讀何書爲文章當祖父意否命列坐於側予之酒食或讀書塾中夜分不歸則遣小婢賜卮酒餅餌慰勞之率爲常兄弟四人每會食輒談藝以娛母夫人爲之解顏

頻夢有小鳥五色如鳳皇百十其羣飛遶左右又屢夢人贈古墨嗅之有異香人以爲文字之祥

山人少時又嘗夢一丈夫屬對出句云君子有酒旨且多山人應聲曰詩人之賦麗以則

順治七年庚寅十七歲再應童子試郡邑提學三試皆第一提學道鍾公性樸大興人明崇禎癸未進士賞其文似戰國策

〔池北偶談云〕鍾字文子順治初爲濟南府推官遷本省提學道
僉事〔考功年譜曰〕是時方伯公年九十無恙君朝夕定省退與
諸弟讀書談藝甚樂之

八月元配張夫人歸夫人鄒平人祖延登明萬曆壬辰進士歷官南
京都察院右都御史父萬鍾拔貢南渡官鎮江府推官

是年讀書水月禪寺寺在大明湖東北

十餘人皆朝一陸

順治八年辛卯十八歲應鄉試舉第六名主考戶科左給事中杜公
篤祐蒲州人明崇禎丙子舉人歷官都察院左都御史兵部員外郎
楊公時薦鉅鹿人順治丙戌進士歷官兵部督捕右侍郎同考夏津
知縣夏公人佺壽州人順治己丑進士歷官監察御史初定解元者
三日矣後乃易昌樂滕國相以經同改第六名方伯公舊藏邢太僕
侗蘭亭序白鸚鵡賦王維撰二卷深所寶惜嘗謂諸孫有登賢書者當
以爲賜戊子長兄報捷得蘭亭卷至是山人得白鸚鵡賦卷

是冬山人與西樵同上公車每停驂輟輒輒相倡和書之旗亭驛壁〔王丹麓今世說云〕新城二王每遇郵亭野店輒題詩壁上詩既驚人使筆斗大龍拿虎攫尤悔菴侗道經燕齊見之解鞍造食坐對移晷不能去

順治九年壬辰十九歲會試被落伯兄舉禮部

〔考功年譜云〕君受知學士武陵胡公此菴統大名成公青壇克

則宮允陽城喬公白山映會當軸修郅武陵借磨勤以傾主司會元

程可則被黜先生及蔣中和戚藩等二十餘人皆停一科

順治十年癸巳二十歲秋八月長子啓涑生十月布政公考終於里第時嚴寒大雪連旬隨父母諸兄後日夜侍疾

方伯公卒時年九十三鄉人私謚康節先生〔池北偶談云〕先祖年九十餘讀書排纂不輟雖盛暑衣冠危坐未嘗見其科跣癸巳歲作自祭文有云不敢喪心不求滿意能甘澹泊能忍閑氣九十

年來於心無愧可偕衆而同遊可含笑而長逝蓋實錄云公年雖大耄時時夜夢侍先曾祖司徒府君或跪受撲責如過庭時焉是年有冬夜過傅濟汝詩載蠶尾後集

順治十一年甲午二十一歲叔兄拔貢入國學

是年有湖山佳境亭詩載漁洋續集

順治十二年乙未二十二歲

山人北上至趙北口有竹枝詞十首

集一云柳枝詞其一載蠶尾後

條樂遊原下索春饒銷魂橋上銷魂樹不待飛花魂亦銷後丙午年過此有詩云六載隋堤送客驂樹猶如此我何堪銷魂橋上重相見一樹依依似漢南蓋自揚州是年西樵以殿試與山人同司李量移禮部入都道中作也

上公車東亭亦以太學生廷試入都始與海內聞人縞紵論交

時號三王

計甫艸廣說鈴云予同年王子側居西樵阮亭間才堪

子側詩援筆輒成多見警拔同人每相太息曰濟南二王才故奇亦以蚤貴聲譽先布子側才何嘗肯作蜂腰哉人以爲知言

會試中式第五十六名未殿試而歸五月抵里

〔角巾錄曰〕先方伯公有知人之鑒年九十餘聰明不衰嘗語祭酒公曰汝諸子皆佳將來成進士者三人某某是也幼者尤早達既而先西樵兄以順治壬辰某以順治乙未先東亭兄以康熙庚戌相繼成進士而某得雋尤早異哉

主考大學士金公之俊吳江人明萬曆己未進士內閣學士胡公兆龍山陰人順治丙戌進士歷官吏部右侍郎同考翰林編脩陳公彩廣東順德人壬辰進士歷官江南常鎮道參政

順治十二年丙申二十三歲

春與邑高士徐

夜

東癡同游長白山凡柳菴上書堂醴泉寺諸勝

皆至焉刻長白遊詩一卷東癡爲季木先生外孫順治癸巳年山人始與定交嘗贈句云湘東品第留金管江左風流續玉臺每雪後與東癡必有倡和之作至數十首

四月省伯兄於東萊

〔考功年譜云〕順治十二年君就殿試君既風神玉立又夙工歐陽書盛有文名於時時謂非館閣不足以辱君既而前政尙以武陵之故易置末甲及館選復不得與遂投牒吏部乞改教職九月

歸里十二月赴萊州府學教授

觀海於蠡勺亭五日遊龍溪遊亞祿山林氏園觀窟室畫松皆有詩

〔詩〕〔集〕〔編〕〔年〕〔始〕〔此〕

山人自乙未五月買舟歸里始棄帖括專攻詩聚漢魏六朝四唐宋元諸集無不窺其堂奧而撮其大凡故詩斷自丙申始〔錢塘吳君寶崖云〕先生論詩要在神韻畫家逸品居神品之上惟詩亦然司空表聖論詩云梅止於酸鹽止於鹹飲食不可無酸鹹而其美常在酸鹹之外余嘗深旨其言酸鹹之外何味外味外味者何神韻也詩得古人之神韻卽昌谷所云骨重神寒詩品之貴莫踰於此矣

五月第二子啓渾生

順治十四年丁酉二十四歲八月遊歷下集諸名士於明湖舉秋柳社

二東名士如東武邱海石石常清源柳公隆燕任城楊聖宜通兄弟

聖喻通睿聖企通俊聖美通倣益都孫仲孺寶輦咸集

賦秋柳詩四章詩傳四方和者數百人

〔南城陳伯璣評云〕元倡如初寫黃庭恰到好處諸名士和作皆

不能及〔汪鈍菴云〕嚴給事沆稱東風作絮糝春衣一首如朔鴻

關笛易引羈愁讀之良然〔菜根堂詩集序云〕順治丁酉秋予客

濟南時正秋賦諸名士雲集明湖一日會飲水面亭亭下楊柳十

餘株披拂水際綽約近人葉始微黃乍染秋色若有搖落之態予

悵然有感賦詩四章一時和者數十人又三年予至廣陵則四詩

流傳已久大江南北和者益衆於是秋柳詩為藝苑口實矣

順治十五年戊戌二十五歲赴一殿試居二甲館選不得與故事進士二甲前列授部主事是科以給事中言改外任二甲前十人為知州餘及三甲如干人以前為推官餘皆知縣庶吉士外無京職自是科始館選罷不得歸觀政兵部謁楊忠愍公繼威祠有詩夏秋與長洲汪琬荅文南海程可則周量以詩相倡和

山人居慈仁寺嘗寓書西樵

時在東萊

云長夏僦居慈仁日坐臥雙松

下涼風時至爽沁肌骨一二友人來就語亦不復命巾韉日夕竟去都忘時世周旋〔汪鈍菴說鈴云〕王十一在京師將遷寓慈仁寺予往阻之曰子寓慈仁不得不賦雙松詩恐損子名王傲然曰寓不可不移詩那可便作案王集中載報國寺雙松歌一首贈許天玉蓋是歲移寓後作也歌詞雄偉沉麗與題頗相稱王既為此言而其後竟爾操筆才人固是難量

九月歸里

順治十六年己亥二十六歲謁選得江南揚州府推官是年居京師久與汪程洎潁川劉體仁公駸鄢陵梁熙曰緝崑山葉方藹子吉海鹽彭孫通駿孫倡和最多

是冬山人與西樵及羨門倡和香奩體詩刻彭王倡和集〔說鈴云〕二王好香奩詩倡和至數十首劉公勇寓書於予問訊博士曰王六不致墮韓冬郎雲霧否此雖慧業然併此不作可也案博士香奩詩自序云情至之語風雅掃地然不過使我于宣尼廡下俎豆無分耳蓋其託興如此董文友以寧嘗以此語問鄒程邨祇程邨笑曰待歐陽公罷祀時那時再理會

六合李敬聖一武進董文驥玉虬亦來會合肥龔端毅公芝麓以前左都御史謫國子助教合諸詞人祖席賦詩聯爲巨軸是冬伯兄自萊州府教授內遷國子助教至京師

〔考功年譜云〕秋八月遷國子助教便道省覲於家十一月同禮

吉赴京師

六月祈籤正陽門關壯繆祠云今君庚甲未亨通且向江頭作釣翁
玉兔重生應發跡萬人頭上逞英雄明年庚子至揚州居五年甲辰
內遷至庚申閏八月拜國子監祭酒庚甲江頭玉兔重生之語皆驗
〔池北偶談〕〔載此事云〕所謂庚甲蓋合始終而言之揚郡瀕江
故曰江頭也至庚申年八月置閏而予以崇禎甲戌生實在閏八
月過閏中秋四閱月遂蒙

聖恩擢拜大司成於是乃悟玉兔重生之義

順治十七年庚子二十七歲赴揚州匡廬公就養偕行三月到官

山人赴廣陵時孫夫人送之灑上曰汝少年爲法吏吾懼之然揚

故爾祖舊游地也

崇禎間康字公會任揚州兵備副使

其務盡職守以嗣前烈山人

受教而行

八月充江南鄉試同考試官

〔王丹麓今世說云〕阮亭為同考至白門夜鼓柁行大江中漏下將盡始抵燕子磯王興發欲登會天雨新霽林木蕭颯江濤噴湧與山谷相應答從者顧視色動王徑呼東莖以往題數詩於石壁從容屣步而還翼日詩傳白下和者凡數十家

分較易二房得盛符升郭士琦王立極吳之頤王朱玉孫謙朱廷獻謝廷爵崔華黃裳等九人九月病歸揚州

山人在闈中得疾危甚東亭聞之兼程至揚州為治藥裹三閱月

始痊有屨提軒病中漫興詩

海客秋善病歸來臥茅屋東牕蔭叢桂西牕羅斑竹露檻警孤鶴風櫃散

疎菊以此澹漢心聊取媚幽獨鴻鵠薄天游磨慶樂巖谷山人嘗以是詩示汪鈍菴曰此當不減韋左司汪笑曰露檻警孤鶴風櫃散

冬至常州登京口三山有過江集

十一月山人病初起有事南蘭陵與京口別駕程崑崙

康莊同游金

焦北固及鶴林招隱竹林寺海嶽菴諸名勝得遊記六題名七古

近體四十編爲一集〔張吏部公選九序云〕筆墨之外自具性

情登覽之餘別深懷抱時以爲名言

順治十八年辛丑二十八歲在揚州

舊例府僚迎春瓊花觀以妓騎而導輿太守節推各四人同知己
下二人既竣事歸而宴飲仍令歌以侑酒府吏因緣爲奸利山人
深惡之語太守一切罷去揚人一時誦美之

春至蘇州過無錫登惠山歸復有事於江寧有白門集入吳集歲暮
懷人絕句始自號漁洋山人是年戶部侍郎葉成格刑部侍郎尼滿
駐江寧讞海寇陷宣城金壇儀真諸大案羅織問官監司已下死者
甚衆山人所讞皆於良善力爲保全奸宄率置反坐而獨獲無咎有
天幸焉

先是海寇犯江上宣城金壇儀真諸邑有潛謀通賊者 朝命大
臣讞其獄辭所連及繫者甚衆監司以下承問稍不稱指皆坐故

縱抵罪山人案獄乃理其無明驗者出之而坐告訐者大臣信其誠不以爲忤全活無算

正月有事吳郡看梅元墓宿聖恩寺望太湖漁洋湖中小山也一峯正當寺門愛其秀峙無所附麗取以自號

是春以例往松江謁直指次澣墅聞鄧尉梅花盛開遂輕舟入太湖口自光福元墓留聖恩寺四宜堂信宿而返舟泊楓橋過寒山寺夜已曛黑風雨雜遝山人攝衣著屐列炬登岸徑上寺門題詩

二絕而去一時以爲狂詩載辛丑稿是役也發朱方次雲陽抵吳闈歸

經伯鸞之溪賦詩共六十餘篇爲入吳集

三月有事金陵居秦淮邀笛步賦秦淮雜詩

山人至金陵館於布衣丁繼之家丁故居秦淮距邀笛不數弓山人往來賦詩其間丁年七十有八爲人少習聲伎與歙縣潘景升福清林茂之遊最稔數出入南曲中及見馬湘蘭沙苑在之屬因

為山人縷述曲中遺事娓娓不倦山人輒撫掌稱善掇拾其語入

秦淮雜詩中詩益流麗隄側可詠可誦又屬好手畫清溪遺事一

冊陽羨陳其年維為題詩山人復成小詞八閩摹畫坊曲瑣事盡

態極妍諸名士和者甚眾每讞事畢輒肩輿往烏龍潭靈谷瓦官

諸寺城南高座長于諸古刹探幽訪古而公事未嘗廢也吳祭酒

梅邨嘗以山人擬劉穆之 秋七月泊舟海陵取徐迪功高蘇門

二集評次錄為一通康熙己卯刻於京師又嘗摘取唐律絕句五

七言若干卷授嗣君清遠兄弟讀之名為神韻集今廣陵所刻止

書是月與全椒吳玉隨客儀真有鑾江倡和集山人序云輕寒懷

京之遊風流聽散言念邱樊之樂昆從飄蓬話賓鴈以將愁望

行雲而寤歎楚大夫傷搖落臨水登山梁王孫怨寄波潮江楓

林葉況復難臺夢遠江東之桃葉難逢螢苑人稀河南之楊花又

落燕城斜日風景蒼涼瓜步清秋川原蕭瑟此固騷人所為悵望

而秋士于以感興者也又況五馬悲頭方山亭之下典午之遺跡不

家塾巾而共訪名園命楫而同遊江郭揮杯擊鉢四部俱成裂素題襟千人自廢州來名士尤工倒薤之書稷下狂奴欲贈紉蘭之佩人凡四詩凡四十五首附見凡十一則為鑾江倡和集則亦猶温李之漢上皮陸之松陵云爾

前禮部尚書常熟錢公牧齋贈五言古詩有勿以獨角麟儷彼萬牛

毛之句用宋文獻公贈方正學語也又序其漁洋山人集其詩皆丙申後少作有與君代興

之語

〔魚子亭雜錄云〕予初以詩贄於虞山錢先生時年二十有八先生一見欣然為序之又贈長句采其詩入所撰吾炙集所以題拂而揚詡之者無所不至今將五十年回思往事真生平第一知己也

冬赴淮安甓社湖舟中作歲暮懷人絕句六十首丙夜而畢紙盡取案牘尾書之

〔說鈴云〕歲暮懷人詩詞旨清麗間出奇峭語茶邨杜處士語人曰使君才藻如許當是天人〔居易錄云〕詩中所及大半布衣也

今上改元康熙元年壬寅二十九歲在揚州正月第三子啓訪生

是春盛珍示侍御集丙申以來至辛丑紀年之作鏗之吳下〔此

〔山〕〔人〕〔專〕〔集〕〔之〕〔始〕〔也〕 三月西樵遷吏部考功司

主事

母孫夫人就養至揚

〔案〕考功年譜太夫人五月至揚州

山人居官公正嚴肅不畏強禦每疑讞重獄據案立決牘無留滯

時失出法嚴一事被部駁輟至鐫級孫夫人因謂山人曰人命至

重汝但存心公恕升沉非所計也山人奉命多所平反

是歲有事江陰登君山歸過丹陽登觀音山臨曲阿後湖皆有詩刻

壬寅集於金陵其春與袁于令擇菴諸名士

杜于皇濬邱季貞象隨蔣釜山階朱秋厓克生

張山陽養重劉玉少梁嵩陳伯璣允衡陳其年維崧修禊紅橋有紅橋倡和集

山人作浣溪紗三闋所謂綠楊城郭是揚州是也和者自茶邨而

下數君江南北頗流傳之或有繪爲圖畫者于是過揚州者多問

紅橋矣山態人紅橋遊記云出鎮淮門循小秦淮折而北陂岸起幽

窈而明虹下飲于澗又如美麗人靚粧服西北行林木盡處有橋宛

然如垂虹登平山堂至法海寺捨舟而陸徑必出紅橋下橋如

面皆人遊荷塘六七月間齒苞作花香聞數里青簾白舫絡繹如

織良謂勝遊矣予數往來北郭中往往紅橋顧而樂之登橋四望忽

復徘徊感嘆當哀樂之交乘于必往往不喻其故王謝冶城

之語景晏牛山之悲今之視昔亦有然耶壬寅季夏之望與葦菴

茶邨伯璣諸子偶漾舟酒闌興極援筆成小詞二章諸子倚菴

和之釋菴繼成一章予亦屬和嗟乎絲竹陶寫何必中年山水清

音自成佳話予與諸子聚散不恆良會未違而紅橋之名或反

因諸子而得傳于後世增懷古憑吊者之徘徊感嘆如予今日未可知也

南城陳伯璣允衡刻世父侍御公諱與允隴首集於詩慰選中合孫

公傳庭袁公繼咸黃公端伯為四家皆明末殉節者也
〔池北偶談云〕伯父侍御百斯公登崇禎元年戊辰進士入翰林
改御史甲申公家食六年矣聞二月十九之變同妻子盡節於几
案間得手書一紙云京師卒破聖主殉社稷予聞之雪涕沾衣不
及攀龍而殉命遂偕妻子氏子士和併命寢室命也奈何葬從薄

從速隨時也公清介忠信言笑不苟鬚眉若神葬日會者萬人莫不流涕陳伯璣論次公遺集比之宋江文忠萬里云〔居易錄云〕伯璣清羸善病以予故數來揚州選錄詩慰國雅集予居之文選樓頗料理之

康熙二年癸卯二十歲在揚州伯兄以吏部考功員外郎典河南鄉試

〔考功年譜云〕七月遷稽勳司員外郎被命主河南鄉試君居常厭近科程文沿襲摹倣之陋思力振之凡軟熟雷同以爲合有司尺度者悉擯不收得冉覲祖等五十七人皆好奇服古之士君錄其文尤異者爲豫文潔自序其意相國沚亭孫公見之嘆絕以爲場屋之文所未有也

叔兄舉於鄉冬伯兄便道覲省至揚甫一夕山人奉檄赴江寧充武闈同考試官伯兄同舟送至儀真別去各有詩

後一年西樵寄詩云一燈欲臥聞牕響雙屐君來踏砌泥忽憶迎
鑾江上別江風含雨晝棲棲山人亦有懷西樵詩云曾與坡公吟
賞地對床風雨戀真州刻癸卯詩卷

是歲作論詩絕句南昌陳士業弘緒為序

〔漁洋詩話云〕余往如皋馬上成論詩絕句四十首猶子淨各作
注人謂不減向秀之注莊淨名浣小字也〔計甫草東云〕阮亭
先生論詩絕句大致倣元遺山而聲情過之

武闡得邱湛等十九人湛尋中甲辰會元

康熙三年甲辰三十一歲在揚州春與林古度茂之杜濬于皇張綱
孫祖望孫枝蔚豹人諸名士修禊紅橋有冶春詩諸君皆和

〔西樵先生云〕貽上蚤負夙惠神姿清徹如瓊林玉樹朗然照人
為揚州法曹日集諸名士于蜀岡紅橋間擊鉢賦詩香清茶熟絹
素橫飛故陽羨陳其年有兩行小吏豔神仙爭羨君侯斷腸句之

詠至今過廣陵者道其遺事彷彿歐蘇不徒憶樊川之夢也〔陳其年云〕官舫銀鐙賦冶春廉夫才調更無倫玉山筵上頽唐甚意氣公然籠罩人〔宗梅岑云〕休從白傅歌楊柳莫向劉郎演竹枝五日東風十日雨江樓齊唱冶春詞〔劉公駭評云〕采明珠耀桂旗麗矣或率兒兒拜或揚袂從風如欲仙去冶春詩獨步一代不必如鐵崖遁作別調乃見姿媚也

伯兄以磨勘一案無妄下吏議

〔考功年譜云〕以禮部擢撫試文語句指爲有疵考官例奪俸三月而是時功令加峻遂下君吏部五月移刑部子側旣下第留京師經絡囊餼日僅一食夜則共被請室中家人皆震怖雨泣君居之坦然

匡廬公赴京師視之冬獄解

〔考功年譜曰〕先是宗人取古命岳都諫嘗爲君筮得晉之六二曰

受茲介福於其王母至十月三日

太皇太后萬壽節事果得

白〔計甫草廣說鈴曰〕甲辰秋冬間西樵事已漸白阮亭尚不御酒肉面有涕淚痕同人言二王兄弟友愛似眉山二蘇予以語顧茂倫茂倫曰此二王詩之源也

省觀至揚同臥起屣提閣中者彌月

〔考功年譜云〕十一月至揚州士禎以舟逆於秦郵既見而悲君搖手戒勿道前事徑取所賦詩數百篇令讀之曰弟視吾境地差進不比終卷天曙已達廣陵竟不成寐也署中有屣提閣君樂其深靚遂居之每晨夕定省之暇輒居閣中讀書左右圖史列盆山梅花水仙以十數苧袍草履婆娑其間與士禎夜必對床賦詩云

十月山人內遷禮部主客司主事是歲有事於江寧爲伯兄燃燈長干寺浮圖公事了輒與方文爾止徧訪牛首祖堂棲霞諸山及城南

諸古寺觀六朝松石所得歌詩遊記如干篇爲後白門集汪琬茗文
作白門前後集序

康熙四年乙巳三十二歲春有事如皋與邵潛潛夫陳維崧其年許
嗣隆山濤諸名士修禊冒襄辟彊水繪園分體各賦山人得七言古
體卽席成十章

〔陳其年序云〕水繪園修禊詩一卷共八人王阮亭士禛邵潛夫潛

冒巢民襄穀梁禾書青若丹書毛亦史師柱許山濤隆嗣陳其年維崧詩則有

五言古七言古五言律七言律五言絕七言絕爲體有六共詩三
十有八首〔漁洋詩話云〕余與諸名士修禊冒辟彊園分體賦詩
余戲謂其年曰得紫雲捧硯乃可紫雲者冒歌兒最姝麗爲其年
所眷許之余坐湘中閣立成七言古詩十章

杜濬于皇後一日至不及會

或問杜曰阮亭詩何如曰酒酣落筆搖五嶽詩成笑傲凌滄洲又

問君詩如何曰但覺高歌有鬼神誰知餓死填溝壑

匡廬公及伯兄往杭州山人返郡隨謝吏事

〔徐電發鈞云〕王司理去維揚日作江南好數詞予曾于畫船

白板上見之清歌宛轉似白樂天憶西湖諸作

有事於江寧訪見月律師於花山欲往茅山不果六月匡廬公及伯

兄歸自杭七月登舟北行諸名士祖道於禪智寺碩揆禪師方丈有

禪智倡和集初名禪智錄別

山人官揚州五年不名一錢急裝時惟圖書數十篋嘗有詩云四

年只飲邗江水數卷圖書萬首詩

八月過臨菑別墅拜別兩大人偕叔兄上京師

山人與東亭北上道中戲題德州南曲律店壁云曲律店子黃河

匡地名朝來一雨清風霾青松短壑不能住騎驢又踏長安街載見

香祖筆記

到禮部任提督兩館提督兩館主事時劉君廣國實生為主客司郎中是時尚書沙公澄順治

丙戌進士侍郎王公熙順治丁亥進士宛平人以兵書大拜黃公機順治丁亥進士錢塘人以吏書大拜

蓬萊人其後兩侍皆入相沙去繼之者梁公清標崇禎癸未進士真定人以兵書大拜後

亦入相

康熙五年丙午二十三歲暫返里畢氏妹卒山人第三妹也

〔案〕〔王氏家傳〕匡廬公四女一適淄川庠生畢盛肩

過青州留周侍郎櫟園真意亭為題畫冊十餘首往居廣陵曾為題

二十餘首及此而再矣

〔案〕〔山人與周櫟下論畫云〕乙巳夏某在青州真意亭為先生

題畫冊因憶辛丑在揚州壬寅在真州前後為先生題畫賦詩不

下三四十篇今再而三矣

冬如京師山人在揚州五年奉薦皆及格當行取臺省會有同年生

為戶部郎中欲攘之浼吏部上疏以舊時臺省缺員有行取推知及

部郎改授兩例請 旨奉 旨已後科道缺員著以郎中改授這行
取永遠停止復行外官考滿之例山人坐是不與行取甲辰遵例考
滿督撫皆注一等稱職吏部都察院會同覆核始獲內遷其難如此
皆同年生某爲之也舊例推官承追欽賊無考成至是改例考成完
欠與州縣等而楊故有積欠起順治二年止十七年凡二萬兩有奇
本犯已故輒禁其孥甚者株連親族圜填溢山人初至見鳩形鵠
面銀鐙荷械大半株連惻然遣之曰視爾輩皮骨僅存徒事桁楊何
益自今與爾輩約吾爲爾募代輸不復逮比公庭其濟則爾諸人之
福也否則吾以一官殉之皆稽首謝去於是爲手疏自巡鹽御史轉
運使揚州道府以下各縣爲攸助其十屬州縣以案之有無多寡爲
差巡鹽胡侍御道南學文復集諸商庭諭曰曩者瓜儀中海寇之後告
訐紛紛爾曹有覆巢破卵之危迄今身家獲全全者繫誰之力非王
公平曰然亦曾刑辱汝乎曾受汝絲粟之餽乎曾以汝曹爲奇貨媚

往來冠蓋貴游乎曰悉無之然則保全兩淮元氣以還 朝廷者王公力也汝曹豈遂忘之乎皆頓首曰是尸祝而社稷之既數年矣曷敢忘今王公疏募代罪人完十六載之積欠救株累無辜於湯火之中一時同官於揚者皆樂爲欣助汝曹寧無意乎又頓首曰固所願也微公言且籍是以報王公之德於萬分一於是旬日之間代輸合計萬餘金餘三千金有奇請於巡撫中丞張某疏請豁免 旨既下悉召罪人於庭曰始吾憐爾曹係累之苦不忍鞭撻不獲已爲募疏代輸之舉誠不自意事果濟且如是其速也今盡釋汝皆痛哭拜謝而去於是揚屬積欠一清又五年中完欽部大事八十三案揚理官之難爲也如此有維揚信讞若干卷山人官揚州比號繁劇公事畢則召賓客汎舟紅橋平山堂酒酣賦詩斷紈零墨瀋狼籍吳梅邨先生偉業云貽上在廣陵晝了公事夜接詞人蓋實錄也

〔如皋冒辟彊序考績云〕公實今日之循吏仁而明勤而敏廉而

能慎者也維揚南北一大都會商與民錯處者百萬餘家其屬邑又多濱海斥鹵民俗皆窳而無以爲生公至撫綏有方慈惠倍至公又發奸摘伏決斷如神一時府史胥徒舉無所上下其手諸豪亦無敢有所橫可不謂仁而明乎廣陵爲江南劇郡大吏有疑難事下之藩臬藩臬復下之李官黎明坐堂皇羽書旁午征檄兩至公左右裁答酬應若流侍史十餘人手腕告脫嘗以數月完欽件數千一時齟指推爲神異夜分入寢食燃巨燭剖析案牘不少休更以其餘披覽六籍并時輩所著撰甫辨色公又出矣可不謂勤而敏乎公素性澹約事兩親最孝迎養法曹聚百順以事之臨蒞之謹恪守庭訓日食蔬菜一二器不妄費縣官一錢邗溝爲南北咽喉貴人之至者津吏日以百十告公河干一謁而已他無所進又公文章結納遍天下客之訪平山堂唐昌觀者日以接踵公詩酒流連曲盡款洽客相對永日亦終不忍干以私公嘗有一莫逆

至臨別公曰媿官貧無以爲長者壽署有十鶴敬贈其二誌素交

也汪鈍菴葉訥菴事載見二公集客大喜載之而去可不謂廉而慎乎

康熙六年丁未三十四歲在禮部

夏山人門人及凡從學爲詩者哀集壬寅以後諸作爲王禮部集

計甫草朱竹垞諸人序之

是年與汪程劉梁及董御史文驥玉虬李翰林天馥湘北陳翰林廷

敬子端程翰林邑翼蒼輩爲文社兵部尙書合肥龔公實爲職志宋

別駕犖牧仲自黃州入覲京師始定交荷蘭諸國進貢有詩紀事尙

書梁公罷繼之者郝公惟訥順治丁亥進士霸州人終吏部尙書謚恭定

康熙七年戊申三十五歲遷儀制司員外郎

先是甲辰以後令學宮停制藝止用論策取士嚴科場條例至點

畫字句罪勿赦又使天下郡邑不得貢明經及諸典禮多所變易

上親政考稽舊章宗伯毅然以釐革弊政爲己任適山人爲

儀司具亟當改正者數事力請于宗伯宗伯韙其議繕疏進之奉

上報可一時文明之治翕然復興如世祖時由是天下之

士復研精斂志務爲文章聖賢之學所以寢微而旋昌者山人有

力焉

爲孫少宰北海承澤賦古劍行愁霖行山東諸郡縣地震在京師務
汲引後進四方之士以齒頰成其名者甚衆經指授者人稱王門第
子云

是時士人挾詩文游京師者首謁龔端毅公次卽謁山人及汪劉
二公而山人尤好獎厲後學士人多樂就之或謂山人曰公汲引
人物自是盛德然後進之士學未有成得公一言便自詡名士不
復虛懷請益非公誤之耶山人改容謝曰君言是也然山人于朋
輩詩文就質凡有得失亦必直言無隱宣城施愚山常曰吾交游
滿天下直諒多聞惟王先王耳蔚州魏敏果公象樞每有所作必屬

山人指其瑕卽欣然改定謂人曰吾仕京師三十餘年惟心折一阮亭耳晚年有京朝官以詩相質山人爲指摘竄改不少隱其人頗有愠色山人于是知古道之不可行也悔之

康熙八年己酉三十六歲權清江浦關專司船廠造船有陋例自總督漕運都御史下至道府船政同知皆以爲利藪而木商湯甲實操縱其間都御史已下皆供其頤指不暇山人至言於總漕帥顏保盡革之凡發銀皆足秤足色毫無扣除旗丁感悅船悉修驗堅固可涉風濤漕運頗賴以濟而山人終任不名一錢矣淮安張弼力臣長洲惠恕來執贄惠後改名周惕字元龍弼家多藏書頗藉觀焉

是年山人自取甲辰以前廣陵所作乙巳以後禮部所作共一千三百餘首刪其什六益以過江入吳白門前後諸集都爲一編曰漁洋集門生王我建立極庚子年所取士刻之吳門山人以一本付楚雲師

藏之南嶽一本付拙菴師藏之盤山

康熙九年庚戌三十七歲在淮上時同事滿洲郎中交禪以事罷歸京師而船廠部差議裁故久無代者遲數月始得部文北歸時淮揚方濬運河商船不得行幾至缺額冬還京師

〔案〕〔考功年譜〕山人是年十一月以家人至京師是歲叔兄舉禮部成進士伯兄起家補考功司員外郎

上親政後禮部奏改科場條例考官失察不過奪俸前所處分寬者皆還其官故西樵復起爲考功郎時東亭以不與館選北歸山人自淮上復命過家上壽稱觴閭里以爲榮

康熙十年辛亥三十八歲遷戶部福建司郎中時郝公惟訥敏公爲尙書程周量可則以員外郎爲同舍朝夕相倡和而宋荔裳琬曹顧菴爾堪施愚山閔章沈繹堂荃皆在京師與山人兄弟爲文酒之會盛有倡和

〔案〕〔考功年譜〕時又有武鄉程崑崙康莊至京師澤州陳說巖廷敬

合肥李容菴天官翰林泗州施匪菽端官司成德州謝方山重安

邱曹實菴貞江陰曹裁眉禾與汪蛟門懋皆官中書舍人數以歌

詩相贈答也

石門吳之振孟舉彙選其詩為八家刻於禾中未幾郝公遷吏部尙

書繼之者梁公清標是歲重新伯祖太師大司馬宣府特祠

是冬孫夫人患痰症甚劇信至京師山人兄弟倉皇欲棄官歸夫

人語匡廬公寓書力止之未幾病已

康熙十一年壬子三十九歲在戶部正月三日雪後與宋荔裳謝方

山重兄西樵遊西山有游山詩自註嚴處士蓀友繩孫門人四月第

四子啓泮生五月次子啓渾卒

〔考功年譜〕曰渾為某仲子有才具年十七矣

六月奉 命典四川鄉試得楊兆龍等四十二人副之者鄭工部次

公日奎貴溪人已亥庶吉士是役也得詩三百五十篇有奇為蜀道

集

自註施少參愚山閨章徐處士嵇菴夜門人曹舍人峨眉禾汪舍人蛟門懋麟序之

珍做宋版印

所過名山如井陘霍山姑射中條雷首太華少華終南太白雲棧
 蟠冢錦屏天柱岷山青城墓頤凌雲峩眉烏尤五峯塗山平都上
 四崑瞿唐三峽巫山十二峯隆中峴首蘇門百泉諸勝舟車遄發或
 至或不至凡登望皆有詩〔崑山葉子吉評曰〕毋論大篇短章每
 首具有二十分力量所謂獅子搏象皆用全力也〔盛侍御珍示
 曰〕先生蜀道諸詩高古雄放觀者驚歎比于韓蘇海外諸篇
 又有蜀道驛程記二卷歸下三峽次衛輝聞太夫人訃夫人卒于八月初一日
 徒跣奔喪十一月抵里

山人抵里後寢處苦土哀毀骨立柱而後起終三年喪未嘗一飲
 酒茹葷也

居廬與諸兄日侍匡廬公起居是歲過聞喜縣有伯祖太師公及高
 公允升合祠重葺之

東 太師霽宇公以隆慶五年進士授聞喜知縣有善政與史公載德
李公復聘文公作申公田喬公允升合祠俎豆不衰又有特祠在
東門山人使蜀時謁祠下父老子弟聚觀有泣下者

康熙十二年癸丑四十歲居廬長兄考功以毀致疾七月卒

〔考功年譜云〕君以七月二十日酉時終於正寢易簀之際口鼻
皆作旃檀香既而遍體作蓮華蘭蕙種種異香經三日夜不散既
訖殮乃已君之歿未及太夫人小祥者八日鄉之士大夫以君居喪
動循古禮死孝章甚著私謚曰節孝先生
輯考功詩因撰平生師友詩爲感舊集若干卷

〔梅耦長知我錄云〕新城先生著述甫脫藁輒已流布獨感舊集
一書編成逾廿年不以示人因別有微指嘗手疏其篇目見示云
右康熙甲寅撰故無新篇尙有屏風集佇近作入之蓋是集始于
癸丑成于甲寅也〔案〕屏風集他處不載蓋未成書也

冬養疴西山之柳菴

奉匡廬公命也

康熙十三年甲寅四十一歲廬居日侍匡廬公姪啓浣卒長兄次子也

處士徐東癡

夜

游宛鄧歸閉門却掃山人居廬日嘗與往還小祥

後多贈答詩

康熙十四年乙卯四十二歲服闋夏以父命赴京師秋需次歸里是時諸故人皆散去惟翰林李湘北天馥陳子端廷敬葉子吉方藹官京師

山人至京師李陳二公卽日訪于天寧寺適山人他往二公坐塔下以待牡鑰將下始連騎入城及山人之歸也李公偕葉公堅坐慈仁寺邸流連至日晏不得發其篤好如此有留別諸公詩

彭駿孫遜自浙西來間爲文酒之會然無復曩時之盛矣

康熙十五年丙辰四十三歲正月赴京師五月補戶部四川司郎中

時滇閩用兵內而度支外而輸輓倍極煩難山人佐理持籌善爲酌劑處之裕如

九月張恭人卒於家是歲有漫興詩十首雜感詩四首皆感懷而作有輓殉節諸公詩悼亡詩

〔案〕〔編年集〕漫興以下諸詩皆入乙卯稿當是需次歸里後作故末首有白頭清鏡裏歸臥故山春之句悼亡詩入丁巳稿疑辰巳冬春兩年之作耳

康熙十六年丁巳四十四歲在戶部是時尙書爲梁公清標侍郎爲魏公象樞魏公屬定其詩可否一無所徇魏公以書謝云於論文較藝之中見吾心不欺之學足下真古人也

〔山人云〕魏講學故云耳然不欺二字實談藝根柢也

凡爲同人選定詩文集如宋荔裳施愚山孫豹人陶季輩前後數十

家

是年宋牧仲犖王幼華且曹升六貞顏修來光葉井叔封田子綸

燁謝千仞重丁鴈水燁林漫堂年曹頌嘉木汪季角懋皆來談

藝先生為定十子詩略刻之不

藝之中與吾少不辨之...

藝之與謝...

漁洋山人年譜卷上

京始未首...

山...

有...

大...

...

...

...

漁洋山人自撰年譜卷下

小門生東吳惠棟定宇註補

同業學諸子參

康熙十七年戊午四十五歲正月奉旨召對懋勤殿明日諭

內閣戶部王士禎詩文兼優著以翰林官用改侍講未任轉侍讀

〔召對錄云〕康熙丙辰某再補戶部郎中居京師一日杜肇余

臻

閣學謂予曰昨隨諸相奏事上忽問今各衙門官讀書博學

善詩文者孰爲最首揆高陽李公對曰以臣所知戶部郎中王士

禎其人也上頷之曰朕亦知之明年丁巳六月大暑輟講一

日召桐城張讀學入上問如前張公對郎中王某詩爲一時

共推臣等亦皆就正之上舉士禎名至再三又問王某詩可

傳後世否張對曰一時之論以爲可傳上又頷之七月初一

日 上又問高陽李公臨胸馮公再以士禎及中書舍人陳玉

墓對 上領之又明年戊午正月二十二日遂蒙與翰林掌院

學士陳公同 召對 懋勤殿次日 特旨授翰林院侍讀三

月 賜御書存誠大字唐人張繼楓橋絕句又石刻清慎勤格物

大字二幅共四幅有紀 恩詩

夏同學士陳廷敬侍讀學士葉方藹直南書房

〔召對錄云〕某與陳葉二公及讀學張公同內直一日以天花頒

賜 御札云朕召卿等編緝適五臺山貢到天花鮮馨罕有可稱

佳味特賜卿等使知名山風土也故事二品已上奉 旨稱卿獨

內講官亦然真異數云八月內直同陳葉張三學士和 御製賜輔

國將軍詩仍 命次日攜名字印章入內各書一幅即發養心殿

裝潢隨 御筆同賜自是每有 御製必 命和進淄川唐濟武

夢 賚贈詩云何人載筆氣如虹玉殿南頭鳳闕東蠟燭五侯新制誥

鞦韆二影舊郎中臨軒已得 君王喜仰屋難忘司扈窮遙計看

題紈扇日正開芍藥照階紅在禁苑時

上嘗徵其詩錄進三

百篇謂之御覽集未敢專行後彙爲漁洋續集十月奉 旨偕侍

講韓慕廬葵典順天鄉試得王泰來等一百八十六人

康熙十八年己未四十六歲在翰林充明史纂修官是歲以博學鴻儒徵者雲集京師三月 御試體仁閣下入翰林者五十人彭孫通第一施閏章汪琬皆在焉時公卿庶僚皆得薦人魏侍郎象樞詢於山人對曰公以躬行聞天下薦士不當專以文藝必如睢州湯斌者斯無愧矣魏笑曰得之矣遂疏薦之山人與湯初未傾蓋也

湯後以閣學出撫江南入爲大宗伯爲 本朝第一名臣天下競知湯公之薦由魏公而不知魏公之薦湯公自山人發之也

同年楊以齋雍建出撫貴州屬重葺高祖忠勤公永寧衛特祠

時宣城施愚山

閩

梅耦長

庚

毗陵邵子湘

長

海寧陸冰脩

嘉

淑常過

山人邸舍劇談至丙夜始散去陸有詩云科跣到門衣不船是也

康熙十九年庚申四十七歲在翰林

是年李湘北爲閣學陳子端葉子吉相繼爲掌院沈貞蕤爲掌詹
山人及愚山羨門鈍菴其年諸公皆在翰林互相酬倡一時傳爲
盛事

遷國子監祭酒時司業爲劉宣人芳喆辛丑進士

國初祭酒司業未有題各山人與鍾山先生補其闕
是歲八月置閏山人以閏八月生也

山人官司成首奏請定 聖廟祀典照成化弘治間儀制又有請
正從祀諸賢位號增從祀理學真儒諸疏皆有裨文教疏載漁洋
文略

康熙二十年辛酉四十八歲在成均秋七月 賜宴瀛臺九月叔兄
需次卒於京師

尤展成

侗

邵子湘

長

爲作傳

是時太學人才甚盛秋試力持公道公卿紈袴請託不得行所拔識如金居敬湯右曾查昇陶元淳惠周惕輩皆登第爲世聞人所取文字率崇古雅有春秋內外傳史漢文八大家之遺風考取八旗教習以文爲甲乙試日閱卷閱畢榜發始出署苞苴竿牘皆不得行會一統志館移取太學生工書法者立定去取以黃弘猷爲首黃元治次之衆論僉服卽滿州同事亦服其公教習例得通判故山人尤慎之是年冬十二月覃恩進封父禮部公爲朝議大夫國子監祭酒母孫宜人妻張宜人贈恭人

康熙二十一年壬戌四十九歲在成均春正月上元 賜宴 乾清宮
上首倡昇平嘉宴詩倣柏梁體廷臣繼和 命詹事沈荃書之
御製序文頒賜諸臣

〔召對錄云〕上元日有 旨賜內閣九卿翰詹等宴于 乾清宮
詔賦柏梁體詩明日早詣閣門 上頒首倡云麗日和風被

萬方大學士已下以次賡和國子祭酒臣士禎恭賦云九德〔案〕原本作

三德六行為士坊

康熙二十二年癸亥五十歲在成均是歲撰五言七言古詩姜西溟

宸英序之

是年盛侍御珍示衷集辛亥迄癸亥之詩共十六卷重為編次曰

京集曰蜀集曰家集合為漁洋續集屬常熟黃子鴻儀書之明年

刻之吳中

康熙二十三年甲子五十一歲冬遷詹事府少詹事兼翰林院侍講

學士

〔池北偶談云〕祭酒不一二年輒遷去春秋丁祭無過四者順治

中淄川高念東侍郎珩為祭酒久不遷一日至閣洪文襄承疇戲謂

曰高先生可謂五丁開山矣高笑曰無妨六丁六甲果三年始遷

去予在成均迄四載始遷少詹戲為口占寄先生云嘉話曾聞役

六丁任教人笑鈍司成六丁今日還加二始信前賢畏後生

十一月奉命祭告南海是歲科試得人之盛如辛酉粵東之役有

詩三百餘篇為南海集自註門人感待御珍示符升金進士穀似居敬序之

〔陳元孝恭尹評云〕雖不及蜀道之宏放而天然處乃反過之人以

為知言是冬奉命南行雪阻東平望小洞庭中有蠶尾山為唐

太守蘇源明讌賞地因取以名其山房并圖為小照自序梗概以

誌寄託一時海內風雅之士咸謂山人處高位而有超世之志焉

又有粵行三志三卷皇華紀聞四卷韓閣學慕廬葵魏昭士世倣序

康熙二十四年乙丑五十二歲元旦大雪謁五祖山二月十日抵廣

州入南海神廟歲事登浴日亭觀海四月一日發廣州哭故人程兵

部周量之殯過肇慶登七星巖歸阻風雨南康會南豐湯佐平來賀先

生來主白鹿洞書院相約入山遂與孫處士豹人枝蔚南康守周星

公燦遊廬山棲賢開先諸寺皆有詩七月過里省侍祭酒公九月復

命隨請急歸里途次聞府君訃徒跣奔喪

山人于夏六月歸自粵便道過里起居見匡廬公容色肌膚殊減

疇昔怒然動歸養之思因從容言報命後當請假覲省匡廬不

許力命趨裝山人意殊愴然九月復命後一日即循例乞假還

歸而匡廬已先十日捐館徒跣慟哭作孺子啼蓋山人生而孝友

又自讀禮盡制外雖期功之喪亦必歛歔累日輒廢寢饋至性不可

及也

冬姪啓涓卒叔兄長子也

康熙二十五年丙寅五十三歲居廬在西城

時鍾聖輿

轅

趙豐原

京

王秋史

辛

先後來從遊

康熙二十六年丁卯五十四歲居廬秋移南城舊第

是年取唐人殷璠高仲武諸家之選各加刪定而益以韋莊又玄

姚鉉文粹通為唐選十集屬門人盛珍示王我建較刊

康熙二十七年戊辰五十五歲正月聞

太皇太后崩有 詔四品已上京朝官在籍者皆赴京師三月歸里有北征日記是歲撰唐賢三昧集三卷

〔山人云〕林間錄載洞山語云語中有語名爲死句語中無語名爲活句予嘗舉似學詩者門人彭太史直上來問予選唐賢三昧集之旨因引洞山前語語之

康熙二十八年己巳五十六歲正月迎 駕於德州蒙 慰問甚至有迎 駕紀恩錄

〔居易錄云〕己巳正月 南巡視河某以少詹事兼翰林院侍講學士家居迎 駕于德州四奉 溫諭 上尊天廚之賜已述紀恩錄一卷備載其事矣庚午十一月初七日會議端門李少司馬厚菴語予云是日蒙 上賜謝 恩散歸後 上諭侍衛

云王某如尙在外可召令入見侍衛傳 旨則士禎已入城矣復

命 上云既回不必往召 上之恩遇至此

三月葬先祭酒府君暨母孫宜人冬十一月赴京師撰池北偶談成
二十六卷

康熙二十九年庚午五十七歲正月再補詹事府少詹兼翰林院侍
講學士三月遷都察院左副都御史

〔居易錄云〕予自少詹事遷副都御史又旬日馬邑田子湄喜霽
亦自少詹事遷內閣學士一日赴起居館晤別翰林掌院滿洲掌
院學士庫勒納公曰公等亦見冬日鬻花者乎置之密室鑿池作
坎縷竹其下溉以牛溲碯以硫黃筓引沸湯扇以微風盎然春温
經宿而花放矣衆花固未蓓蕾也及二三月衆花應候而發而冬
花已憔悴視其根則已腐敗久矣蓋春花知命而待時者冬花不
知命而違時者也仕宦亦然吾見夫冬花之榮落亦多矣公等今
日之擢乃春花也雖遲發亦不速敗

充 經筵講官 三朝國史副總裁

四月十三日 上以京師畿輔不雨 命三法司赴刑部清理

重囚山人以副憲與焉原者百十八人十五日奉 旨遣九卿分祭壇廟寺觀祈雨山人主靈佑寺

六月長女端卒於京師

七月秋審有楊成者京師細民也貸旗人某甲錢會新年成往省父母妻某氏獨處室中甲適索逋至窺成未歸乃遷延至暮入室挾姦明日成歸妻泣訴之成往甲所詰責甲不伏反毆成走甲持挺逐之成急顧市肆有小刀取擲之中甲要害而斃法司當成故殺斬山人曰凡故殺則有必死其人之心有必死之之心則必挾挺刃以往今成徒手往而反爲甲毆逐急而倉皇取他人之刃以禦之是誤殺非故殺也二律縣殊况甲強姦其婦罪固應死乎又衡陽縣蕭儒英者素挾左道惑衆會有鹽商王子明宿逆旅夜

失三百金募能緝獲者重酬之江西士人曠鼎與妻蕭氏僑遇於衡孱而貧儒英語商能入冥司知盜名翼日又云已至冥司見青面鬼王示以盜卽曠鼎也遂率其黨東張飛等禽鼎至誣拷之又禽蕭氏拷之以其少艾復逼姦之巡撫止擬強姦律絞山人謂儒英罪狀不止是絞當改左道律斬庶足蔽辜如撫擬秋審或邀矜緩則大姦漏網鼎夫婦冤弗伸矣是年奉 旨秋決停止及明年秋審山人復理前語諸公皆曰公言是遂寘儒英于法而改楊成獄擬可矜

九月遷兵部督捕右侍郎

案居易錄十月二十八日

山人官副憲時嘗欲集唐六典諸書作南臺故事一書未幾遷侍郎遂不果先是少宰趙玉峯士麟任督捕有美名山人以承趙後仕虛懷請益趙曰比年條例已極寬大吾輩更當推廣 朝廷德意行之山人遂酌定條例數則題請准行頒之天下由是法益寬簡

康熙三十年辛未五十八歲春奉 命主考會試得張瑗等百五十餘人正主考 文華殿大學士張玉書工部尚書陳廷敬而兵部侍郎李光地及士禎副之

棟先王父硯谿公以是年成進士榜後謁山人甫就坐山人謂曰闡中得君卷張陳李三公皆欲擬第一予獨難之因置第六以數十年老門生暗中摸索反以予故不得元豈非恨事歎息久之蓋先王父于康熙八年執贄于山人迄今已二十三年矣

康熙三十一年壬申五十九歲

正月會議常平倉西安鳳翔二府遵 旨發正項錢糧採買其餘各直省數未足者仍照見行事例捐納初稿有勸輸之語山人與于總憲成龍共言之而止四月循例啓奏八旗逃獲之數故事督捕衙門別有綠頭牌奏知逃官逃兵若干員名止記總數以備顧問而捧牌啓奏係滿洲堂官專責于時 上問侍衛馬三捷逃往

何處席珠公不能對山人不習國語因下吏部都察院察議部院諸公皆言緣頭牌啓奏漢官例不與聞與王公無涉山人曰滿漢堂官平日共事一堂又同啓奏小有利害輒分彼此既非大臣之體又非協恭之誼某不忍爲也遂均議鐫級得旨如議而席珠公等三人皆去位總憲于公深歎服以爲有古大臣風且云本朝此事唯一見于魏敏果公今見于公耳又克什兔者紅帶宗屬自四川隨征回京至鳳翔病疽危甚有張希仁者業瘍醫藥之而愈克什兔遂攜入京師張有子玉女蛇妃等九人克什兔利之私詐僞契誣以賣身及張歸鳳翔克什兔卽以逃人告提比解至部讞得實山人與席珠公斷張夫婦子女歸復版籍爲良民克什兔送宗人府察議克什兔怒牒訴掌宗人府郡王郡王召侍郎辨質克什兔辭塞於是府是部議克什兔革職鞭責山人在部不以強禦翫法率如此也

八月初五日調戶部右侍郎戶部右侍郎徐誥

山人調司農督理錢法故例有呈樣錢立禁革之終事不遣一人

至錢局

康熙三十二年癸酉六十歲夏四月側室陳孺人卒七月第三女宮

卒

九月秋審畢九卿覆議彙題山人言情真案內尙有可議者三其

一於相元聊城縣人年七十五矣舊買薛慎言之田契價久明而

慎言之孫小喜自鬻旗下逃歸挾索相元地價其祖呵之不聽相

元不得已款以酒食予以錢帛不受而索金乃議往市易白金給

之鄉保以其旗人也繩繫而行繫急脰絕遂死有司當相元故殺

山人謂旗人索詐原有禁例況小喜之死死於繫非死於毆殺也

且相元年七十五老矣於律例亦宜末減改緩決其一王訓太平

縣人太學生也其父者佐素封者佐父喪其行財人關中鍵獨不

吊奠者佐以逋欠告之縣中鍵因妻激怒輒飲毒往王氏辱詈者
佐不能堪毆之歸途毒發死有司索賄不得遂當訓故殺山人謂
此一事京輦士大夫皆言其冤且訓代父罪至擬大辟其父已死
是一命已有一抵況向來秋審凡以救父殺人者原情率從未減
況訓實不殺人又身甘代父反不得原非向隅乎改可矜其一房
得亮齊河縣人有族人房懷德幼子阿羣者戲嘲其父名得亮怒
掌擊之阿羣又詈適鎌刀在側得亮取而刺之中要害死當以故
殺山人曰此鬪毆非故也改緩決諸公皆歎服謂公平反三獄吾
卒儕今日集議不虛此行矣山人每遇秋審 朝審必盡言以俟諸
東公決擇不肯委蛇從俗類如此也

是年五月 覃恩贈祖方伯公父祭酒公皆通議大夫經筵講官戶
部左侍郎祖母成張母妻皆淑人

〔居易錄云〕先祖年及大耋親教諸孫相繼成進士先考妣教諸

子雖稍寬假然以布政公之故督課殊切迴憶庭訓且四十年矣
至是乃稍食其報感激 國恩不禁泫然

康熙三十三年甲戌六十一歲在戶部

二月初九日署兵部事六月充纂修類函總裁官同事禮書張敦復閣學王顥菴陸義

山翰林官分纂四十人轉左侍郎

康熙三十四年乙亥六十二歲在戶部

五月 駕在暢春院部務稍暇與同人諸及門為結夏文字之會

山人既次甲子使粵以前及丁卯以後詩庚午以後雜文為蠶尾
集十卷其古文詞前此者復別為漁陽文略十四卷屬門人張漢

瞻序之雲章

時捐納方開多相緣為奸利山人一無所預戒司官凡關捐納事勿
以一呈一稿至前在戶部七年始終矜然如白圭振鷺得全清白舉

朝皆能諒之然笑其愚者衆矣

山人官司農既以廉潔自勵退食之暇兼究心于內典嘗答淄川唐濟武簡討書云少無宦情又口不習言阿堵物雖日在錢穀簿書堆中不啻空山雨雪燒品字柴說無生話時也其高致恬澹如此

康熙三十五年丙子六十三歲奉 命祭告西嶽西鎮江瀆

康熙三十四年十二月十七日乙巳 詔赦天下遣廷臣祭告長

白山五嶽四瀆及歷代帝王陵寢孔子闕里三十五年正月二十

一日戊寅 命下同遣者十六人二十七日甲申 上御保和

殿親閱祝文香帛禮部尚書侍郎等官執事奉使諸臣皆在列閱

畢由太和門馳道出諸臣于午門辭朝行三跪九叩頭禮畢隨至

禮部頒祝文香帛

秋七月過里二十四八月姪啓灌卒叔兄次子也九月復 命京師是

役有詩百餘篇為雍益集

山人寓書盛侍御

符升

曰再使秦蜀往返萬里得詩纔百餘篇皆寥

寥短章無復當年蜀道南海豪放之格然覽古興懷得江山之助

生色有加擬諸眉山集中所分紀行遊覽古蹟寓興諸篇殆兼而

有之

又有秦蜀驛程後記二卷隴蜀餘聞二卷

隴蜀舊游之地具詳驛程記中此又紀其所未備者也

過聞喜縣再葺太師公祠祠初在夾城地湫隘與喬公允升同祀祁

縣戴廷拭楓仲官學博移建專祠於城中

〔秦蜀後記二〕二月二十八日抵聞喜縣先太師公萬曆初知此

縣至今百餘年有桐鄉之思

聞喜漢之左
邑桐鄉也

聞予至諸生父老年七

十以上者數十人率子弟迎十里外至舍館予延坐一一慰勞之

父老具言公恩德自其祖父以來沒齒不忘迄今婦人女子皆能

道公氏籍

歸過灑池縣拜族曾祖曙峯公祠重葺之

曙峯名之都字爾章潁川公孫萬曆中知開封府拔薤鋤梗強宗

斂戢汴人德之為立祠祀于包孝肅祠之右

康熙三十六年丁丑六十四歲在戶部仲兄卒於家十二月十八日

五月進平北雅十二章九月戶部尚書陳公廷敬戶部右侍郎

王公揆俱以原銜充經筵講官時山人先為講官戶部三卿皆

在經筵一時傳為盛事

是年七月覃恩贈祖父皆經筵講官戶部左侍郎加一級祖母母

妻皆夫人

山人仲子官唐山令唐山下邑土瘠民貧山人訓以潔己愛民書

手鏡錄一冊付之

康熙三十七年戊寅六十五歲七月十三日遷都察院左都御史

山人官總憲一循臺規即一掌道亦必論資俸陞遷不徇一情面

以絕奔競之階戒言者不得毛舉細故務崇大體退食謝客焚香
掃地下簾讀書自一二韋布故交以風雅相質外門雀可羅也少
宰趙玉峯士麟謂山人曰公爲戶部侍郎七年屏絕貨賄不名一錢
夫人而知之至爲御史大夫清風亮節坐鎮雅俗不立門戶不急
彈劾務以忠厚惇大培養元氣真朝廷大臣也抑亦今日藥石也
冬奉命直南書房編類御集同直戶書陳廷敬禮書張英工書

王鴻緒

康熙三十八年己卯六十六歲在都察院

聖駕南巡諭諸臣內直如故

二月進南巡頌撰古懽錄八卷

六月側室張孺人卒九月次女婉卒十一月遷刑部尙書夏五月

駕回迎於通州會漢軍御史郭金城疏裁冗員下九卿集議遂欲裁
監察御史若干員山人力持之以爲不可且言前明南北兩臺共設

御史百二十員後裁為八十員 國初裁為四十員後又裁留二十

四員視明代止存五之一今巡按一差雖裁然內而巡視五城登聞

鼓寶泉局 朝 廟 經筵糾儀及監禮監宰外而巡鹽巡視茶馬

諸差繁夥內差不足往往令巡城攝之某尚欲疏請增數員顧可裁

乎且御史言官為 朝廷耳目謂之冗員可乎言之侃侃吏部尚書

庫勒納深以為然漢御史得不裁止裁烏金超哈御史三員

五月 內直南書房 賜御書素縑一幅云曠曠曙色上帆牆野

水波添滿路光知是皇畿程日近林風吹送柰花香蓋舟行 御

製近詩也六月^{二十} 內直 再賜御書大字一聯云煙霞盡入

新詩卷郭邑閑開古畫圖^{棟謹案此係唐章}後與 御賜帶經堂

信古齋二扁分懸東西二第中堂

十一月初五日戶部尚書馬齊吏部尚書熊賜履禮部尚書張英並

入相戶部尚書陳廷敬遷吏部刑部尚書李振裕遷戶部兵部尚書

杜臻遷禮部原任江南江西總督兵部尚書□□□起復兵部左都御史王士禎遷刑部同日命下隨赴乾清門謝恩是歲秋審或以金兩爲重定囚之出入山人獨謂當論情事之輕重不當止論金兩

九月秋審畢九卿會稿中有河南司閔煥山西司郭振羽廣西司竇子雲三起初擬情真山人謂曰凡以救父罹罪者多議矜減此三人雖以刃然止當論其救父與否不必分挺刃也愚意緩決爲當諸公以爲然皆改緩決

康熙三十九年庚辰六十七歲在刑部

五月有北城民徐起龍者其女嫁馮繼隆甫數日其姑曹氏淫悍婦人也引所私辛二僧宣召等逼姦之女不從則加炮烙畏而從之既兩月始許歸寧女泣訴父母起龍羞憤偕其表弟侯六登曹氏之門欲毆之曹氏及其姦夫辛二出禦遂鳴于官解赴刑部司

讞訖呈堂以起龍兄弟白晝抄搶草率結案山人訪得其情實見
有二人銀鐺繫頸問之云徐起龍侯六山人大怒碎其牘擲地詰
滿漢司官汝曹畏勢乎徇情乎抑納賄乎如此爰書乃敢誑我天
地神明其可欺乎立令釋二人銀鐺繫曹氏辛二之頸而令嚴提

宣召到案辛二囊三木曹氏拶指皆吐實宣召至亦具伏遂案律
定擬而斷女離異歸父母都人皆以為快六月二十賜御書帶

經堂扁額令中官送大學士張英處轉頒蓋用漢御史大夫兒寬

故事也山人因取杜子美細雨荷鋤立江猿吟翠屏句屬禹鴻臚

之鼎寫荷鋤圖小照南海梁芝五佩蘭為作歌紀事順天府尹缺吏部

列應陞正陪太僕寺卿錢晉錫光祿寺卿江蘩名 上令內閣

傳諭九卿各舉所知衆相顧未發山人曰凡科道吏部及監司

內陞者皆經 皇上舉拔其品其才 上所稔知九卿所舉未

必能如 睿裁之真確翻恐挂一漏萬且如太僕光祿皆有職掌

事務煩劇今之府尹與古之京兆事體不同號爲閑曹未有可爲
太僕光祿列卿而不能勝京尹之任者也遂罷舉仍以前名列上
上竟用錢爲府尹後再亭贈詩曰議屈羣言退食遲蓋指此
事也

秋九月充武會試讀卷官

〔居易錄云〕十月初四日 太和殿試庚辰科武進士周卜昌等

一百人某以刑部尙書與讀卷是晚閱卷六十初五日晨同部院
啓 奏畢與大學士馬公熊公張公等趨往紫觀閣候 駕觀馬

射 上登舟至行殿 御弓矢親射 諸皇子宗室及侍衛以

次射畢始試進士讀卷官侍坐終日試畢 上復御弓矢如前

射畢隨 駕入晚閱四十卷初六日啓 奏畢復趨 行殿候

駕觀步射 駕至 御弓矢如前射畢上親選十三人既而止留

八人至暮復 御弓矢隨 駕入卽同諸臣賫 殿試卷至 乾

清宮

上乘燭御西暖閣欽定第一甲三名二甲前五名是日

垂問

臣

士禎年齒科分甚悉又

命取西洋近視眼鏡令試之歸

館已及二更初七日啓

奏畢出至

太和殿前更朝服候臚傳

山人官司寇矜慎庶獄力從寬大於秋審

朝審尤不敢唯阿緘默

因以改正全活者甚衆居易錄略記數事不能件繫然自爲副憲卽然不自總憲司寇始也宗人燕子喜巡撫貴州同年劉維禎瑞公官貴西道參議屬重葺永寧忠勤公祠

康熙四十年辛巳六十八歲三月請急遷葬奉

俞旨卿才品優長簡任司寇正資料理覽奏情詞懇切准給假五個月事竣速來供職不必開缺該部知道五月出都

王氏自太僕司徒二公發祥藏書尙少至司馬方伯二公藏書頗

具矣亂後盡燬兵火山人兄弟宦游南北次第收緝康熙乙巳自

揚州歸惟圖書數十篋及官都下三十年俸錢所入悉以購書嘗

有一士人數謁山人而不獲一見以告徐健菴乾學健菴笑謂之曰

此易耳但值每月三五於慈仁寺市書攤候之必相見矣如其言

果然為御史中丞時秀水朱竹垞嘗為作池北書庫記及是給假

歸里諸門生為紀其盛屬廣陵禹慎齋鼎寫載書圖以道其行圖

成各有詩紀事

歸行焚黃禮於祖墓父墓撰居易錄成凡三十四卷十月赴京師

是年二月撰浯溪考二卷

康熙四十一年壬午六十九歲在刑部

四月六日賜御書信古齋扁額

冬奉 旨同內閣九卿閱 御試順天舉人卷

十月初十日山人試筆云再雪竟夜積素滿庭晚菊尚數腴可玩

晨起忍寒坐信古堂對雪看菊忽梁溪琴僧岳蓮見過彈平沙落

鴈漢宮秋二曲古音蕭寥忘其身在長安官是秋曹之長也作二

詩紀事

詩載蠶尾續集

康熙四十二年癸未七十歲在刑部

三月進萬壽頌十九日赴暢春苑啓奏刑部釋放囚犯八百餘

人是日請旨御批又減等二十一人五月賜滿漢大學士

尙書侍郎御書扇各一山人得御製虎邱五言律詩一首七

月初五日上傳尙書王某大理寺卿李斯義掌河南監察御史

呂琨同內閣戶部赴乾清門問山東今年水災情形并問前遣

官照口外養蒙古例往賑實有益于百姓否山人奏曰皇上

軫念民艱特遣人員照口外養蒙古之例賑濟地方大小官員仰

體聖意實心料理不敢文具視之自實有裨益于百姓但今年

之災非比去年去年被水不過十餘州縣今年則六郡無不被水

加以丹災視去年不啻數倍今舊穀已盡新穀絕望民間所苦在

于無米上諭戶部尙書凱音布速發通州倉米往賑十月

上賜內閣九卿西域蒲桃人二株山人以尙書與焉有紀 恩詩
康熙四十三年甲申七十一歲在刑部三月奉

旨同都察院公勘玉泉山內外河工

集乙亥迄甲申官少農以至大司寇京邸之作爲蠶尾續集中間

丙子使蜀詩不與焉錢塘吳寶崖

陳琰爲之序

秋九月罷歸以王五一案失出也此案司官委咎於堂官滿官又委咎於漢堂官山人自以年衰前年引陳力之義蒙 恩不使開缺回京欲乞骸骨以大學士熊公禮部韓公疏上皆不允不敢繼請茲以微罪行幸矣故於都察院察議文深周內絕不與辯山人服官至是四十五年矣

山人以申告冤抑一案失出罷官或曰此事自有本末公當辯明
山人曰吾年已遲暮今得返初服足矣遂巾車就道圖書數篋而已送者填塞街巷莫不攀轅泣下相國沁州吳公執手歎曰大

賢去國余不能留負愧多矣時十月十三日也先是山人所居里第東堂老桐朽竅中忽生芝其色白至是罷官

是年三月 覃恩贈祖父皆資政大夫經筵講官刑部尚書祖母

妻皆夫人

康熙四十四年乙酉七十二歲在里中

四月游漪園及大明湖諸勝同游者鍾聖輿續朱子青緇也皆有

記及詩記載蠶尾續文詩是年夏避暑西城別墅(始)(敘)(年)

(譜)

冬三子啓訪自唐山歸需次於家五月以迎送

聖駕兩至德州主謝氏青墩相國家也

康熙四十五年丙戌七十三歲在里中正月趙氏妹卒

山人第四妹也適益都太學生趙君作肅

二月三男婦王氏卒三月姪啓澹卒仲兄次子也四月往于茲山別

業憩夫于草堂山有古夫于亭取義於此卽陳仲子所居抑泉口也
是年得詩九十一篇爲古夫于亭藁

山人旣歸里第閉戶著書不以一字通朝貴門無雜賓惟與張蕭

亭實篤歷友居慶諸君茗飲焚香往來倡和積成卷軸明年五月大名

成周卜昭文較刊于京師之慈仁寺

康熙四十六年丁亥七十四歲在里中是歲大旱巡撫檄濟東道宋

澄溪廣業臨縣賑饑紳士俱具冊領賑山人獨不具冊宋以爲 朝廷

之恩不可虛山人曰某不敏備位大臣頃四十二年二東饑奉

旨各自養佃戶今雖里居敢忘前 旨遂力辭之宋述於中丞以

爲得大臣之體然義利之辨不得不言其實瓶無儲粟鄉人皆知之

康熙四十七年戊子七十五歲在里中宋洪文敏公邁集唐絕句萬

首經進孝宗御覽山人少習是書惜其踏駁久欲爲彙定而未暇也

是歲乃克成之冬門人李太僕曲江先復浙歸過訪李山人壬子所取

士也於今五十餘載師生之誼老而彌篤臨別黯然

是年山人次一歲之作爲蠶尾後集

康熙四十八年己丑七十六歲在里中先祖方伯贈尙書公著羣芳譜刻於虞山毛氏汲古閣流傳已久康熙四十四年奉

旨開館

廣續

命編脩

臣

汪灝等四人爲纂脩官至四十六年告成凡一百

卷

賜名佩文齋廣羣芳譜

御製序文冠於編首仍存先臣自

序每卷小序亦所不遺是年著分甘餘話謹錄

御製序文於卷

首以紀

聖恩冬侍讀黃崑圃

琳叔

視學山左省山人於里第黃山人

辛未所取士也情話之餘述

詔旨取故靈壁知縣馬驥所著繹史

刻板入

內府因感賦一絕載蠶尾後集

〔池北偶談云〕馬驥字驄御一字宛斯濟南鄒平人順治己亥進

士仕爲淮安推官終靈壁令生而清羸博雅嗜古尤精春秋左氏

傳又著繹史其書最爲精博時人稱爲馬三代康熙癸丑歲卒官

靈壁人皆爲制服云

康熙四十九年庚寅七十七歲在里中山人夙有疝氣二十餘年時發爲累是歲忽嬰瘍症輾轉床褥苦不可言冬十二月奉 旨朕

每因朝列舊臣漸次衰謝時切軫懷爰命內閣詢問順治年間進士所有罷職在籍者已無多人王士禎江臯周敏政葉矯然徐淑嘉宋慶遠皆因公累誤屏廢里居今年臻耄耄深可憫念著復還原職以示朕格外加恩至意餘依議山人感荷 聖恩雖瘍症甚劇使兒

輩扶掖向 闕謝 恩卽具疏遣次兒啓沆恭齋入謝

是年刻己丑庚寅近詩一卷山人乙酉年撰詩話六十條戊子秋冬間又增一百六十條共成三卷是秋授門人黃侍讀叔琳序而梓之

康熙五十年辛卯七十八歲在里中山人以順治辛卯舉於鄉是歲爲康熙辛卯如瘍症得愈肩輿至省與新郎君序老少同年亦一佳

話因口占一聯云得第重逢辛卯歲刪詩斷自丙申年

〔案〕〔王氏家傳〕山人卒于五月十一日卽于是年十二月初七日葬于系河北岸祖塋之次

附嗣君跋

右先君年譜一卷自著於康熙乙酉未幾而忽嬰癢症時作時輟故丁亥以下乃病中口授不肖輩書之已有真本付先長兄清遠較閱尙未付梓不意先長兄於丁未年忽得風症五載而逝真本迷失不肖於殘編敝篋中得此草本恭錄以藏識者鑒之痛念先君自嬰癢症之後苦不堪言不肖輩從旁竊視精神大減至庚寅初秋變爲瘍症呻吟床褥其苦更甚會歛中程君聖跂哲友聲鳴昆仲以書來徵先君平生詩文彙爲全集鏤板以行先君呼不肖輩曰余所著詩文每欲刪繁就簡合爲一集付梓未果頃門人程氏昆仲之請甚愜余懷因於病次置各集於枕旁命不肖查檢朗

誦詳加去留力疾編次共九十二卷顏曰帶經堂集至辛卯冬始
削劂告竣不意是書賫到之時距先君之變已五閱月竟不及見
矣悲夫因憶辛卯春瘍症愈甚語不肖曰吾初官維揚時爲居烈
婦雪冤一事久欲爲立一傳因循未果今煩悶鬱轡中偶於枕上
得之了此一段公事隨口授命不肖書之孰意此文竟成絕筆也
嗚呼悲哉以上二事皆不肖親承府君之命者因附及之不肖男
啓泚謹識

漁洋山人自撰年譜卷下